

靖節先生集

靖節先生集卷之十

安化陶澍集注

集聖賢羣輔錄下

太尉河南杜喬字叔榮

狀喬治易尚書禮記春秋晚好老子隱居不仕年四

十為郡功曹立朝正色有孔父之風

太常燉煌張奐字然明

狀奐廉方亮直

學該羣籍前後七徵十要三為邊將財貨珍寶一無所取矯王孫裸形宋司馬為石柳幅巾時服無

棺而葬焉。澍案李公煥本汲古閣本作前後七

徵十要何孟春本作前後仕進十要銀艾惠棟後

漢書補注引甄表狀作七徵十要此何据後漢書

十要銀艾改耳孔平仲曰銀即印艾即綠綬謂之

一佩之也。侍中河內向詡字甫興

狀詡博覽羣籍兼好黃老

元虛泊然肆志不慕時倫積三十

年澍按後漢書獨行傳作向栩太傅汝南陳蕃

字仲舉

狀蕃瓊偉秀出雅亮無倫學該墳典忠壯

社稷幾事不密

太尉沛國施延字君子

狀延清公

許國臨難不顧名著漢朝惠棟口東觀記延以

選舉貪汙策罷甄表狀似非實錄故范書無傳少

府潁川李膺字元禮

狀膺承三公之後生高潔之

宣於華夏高

司隸沛國朱寓字季陵

一名詡右一

無識知行狀者告本郡訪問者

太僕潁川杜密字

周甫

狀密清高雅達名播四海

大鴻臚潁川韓融字

元長

狀融聰識知機發于岐嶷時人名之曰窮神

十年本身守

司空潁川荀爽字慈明

狀爽年十二

羣公卿校咸丈人也或遣進奏

司空清河房植字

或親候從儒林歸服究極篇籍

伯武

狀植少履清苦孝友忠正歷位州郡政成化

齊清風高節

聘士彭城姜肱字伯淮

狀肱履元知立性純固事

親至孝五十而慕學綜六藝窮

太尉下邳陳球字

伯真

狀球清高忠直孝靈中年

司空山陽王暢字

叔茂

狀暢雅性真實以禮文徵士陳留申屠蟠字

子龍

狀蟠年九歲喪父號泣過于成人未嘗見齒

雉以孝稱州郡表其門閭衛尉山陽張儉字元節

不就徵年七十二終于家

狀儉體性忠實閨門孝大司農北海鄭元字康成

友臨官賞罰清亮絕俗

狀元含海岱之純靈體大雅之洪則學無常師講

求道奧數宣聖範錯綜其數作五經注義窮理盡

佐徵士樂安冉瑒字孟玉

狀瑒體清純之性蹈高

潔之行前後十五辟皆

不就除高唐令色斯而舉時陳仲舉李元禮陳仲

弓皆歎其高風謝按後漢書陳蕃傳周瑒字孟玉

此作太尉漢中李固字子堅狀固當順桓之際號

冉誤惡直醜正害其道桓有道太原郭泰字林宗狀泰

帝即位遂死于讒宏深孝友貞固名布華夏學冠羣儒州郡

禮命會不旋軌辟司徒徵有道並不屈益州刺

史南陽朱穆字公叔狀穆中正嚴恪有才數明見

賤之風上書陳損益辭切情至尚書會稽魏朗字少英狀朗資純

輔國朝忠誓正直聘士豫章徐穉字孺子德高偉

清英超世前後三徵未嘗降志抗名山棲度遙將

養志浩然有夷齊之高遜伯玉卷舒之術

軍安定皇甫規字威明狀規少有岐嶷正直之節

用退隱山谷
敦樂詩書

右魏文帝初爲丞相魏王所旌表二十四賢

後明帝乃述撰其狀見文帝令及甄表狀

太常燉煌張奐字然明

爲度遠將軍幽并清靜吏民歌之徵拜大司農賜錢

除家一人爲郎辭不受願徙居華陰故始爲宏農人度遼將軍安定皇甫規

字威明太尉武威段熲字紀明

右涼州三明並著威名於桓靈之世悉名士

也見續漢書

韋權字孔衡權弟瓚字孔玉瓚弟矩字孔規

右太尉掾韋子才之三子皆修仁義兄弟孝

友逢盜賊一人病不能去兄弟相慕

汲古閣本作保

兵至俱死時入稱之號韋三義見三輔決錄

荀儉字伯慈

漢侍中悅之父

儉弟緄字仲慈

濟南相漢光祿大夫或之

父年六十六

緄弟靖字叔慈

或問汝南許劭靖爽孰賢劭曰二人皆玉也慈明外

朗叔慈內潤靖隱身修學動必以禮太尉辟不就年五十五

靖弟燾字慈光

舉孝

廉年七十汲古閣本燾作壽

燾弟汪字孟慈

昆陽令年六十

汪弟爽字

慈明

公車徵為平原相遷光祿勳司空出自爽弟巖藪九十三日遂登台司年六十三

爽弟

肅字敬慈

守舞陽令年五十

肅弟專字幼慈

司空掾年七十對按後漢

書章懷注專本作數

右朗陵令潁川荀季和之八子並有德業時

人號之八龍居西豪里勃海宛康

樹按後漢書荀淑傳

作苑康苑苑通知名士也時爲潁陰令美之

作范則非也曰高陽氏才子八人遂改所居爲高陽里見

張璠漢紀及荀氏譜

公沙紹字子起紹弟孚字允慈

北海耆舊傳稱孚與荀爽共約

出不得事貴勢而爽當董卓時脫巾未百日位至司空後相見以爽違約割席而坐孚弟恪

字允讓恪弟達字義則達弟樊字義起

右北海公沙穆之五子並有令名京師號曰

公沙五龍天下無雙穆亦奇士也見魏明帝

甄表狀及後漢書

惠棟後漢書補注袁山松書曰公沙六龍天下無雙

范書公沙穆傳亦云六子皆知名與此異

膠東令盧汜昭字興先樂城令剛戴邴字子陵

各本作戴祈何校宣和本作戴邴額陰令剛徐晏字孟平涇令

盧夏隱字叔世州別駕蛇邱劉彬字文曜一云世州

右濟北五龍少並有異才皆稱神童當桓靈

之世時人號為五龍見濟北英賢傳

孝廉杜陵金敞字元休位至兗州刺史上計掾長陵第五

巡字文休與先之子興先名種司空伯魚之孫上

計掾杜陵韋端字甫休位至涼州牧太尉端按章

涼州牧徵為太僕此作太尉疑誤

右同郡齊名時人號之京兆三休並以光

元年察舉見三輔決錄

晉宣帝河南司馬懿字仲達魏司空潁川陳羣

字長文 中領軍譙永樂字彥才 侍中濟陰吳

質字季重

右魏文帝四友見晉紀

魏步兵校尉陳留阮籍字嗣宗 中散大夫譙嵇

康字叔夜 晉司徒河內山濤字巨源 建威參

軍沛劉伶字伯倫 始平太守陳留阮咸字仲容

籍兄散騎常侍河內向秀字子期 司徒琅邪王

戎字濬仲 各本作濬冲何校宣和本作濬仲謝按諸書皆作濬冲惟嵇康別傳作濬仲與

此合

右魏嘉平中並居河內山陽其為竹林之游
世號竹林七賢見晉書魏書袁宏戴逵為傳
孫統又為讚

吳範相風吳人劉惔占氣河內人趙達算河內人皇象書

廣陵嚴子卿基名昭武衛尉峻從子宋壽占夢按三國志注作嚴武

十不曹不興畫為孫權畫屏風誤落筆點素因以

失一為蠅後張御坐權以為真蠅手彈
不去方知孤城鄭姥相見王粲于童賤謂仕必
其非也至師傅後為太子太傅

右吳八絕見張勃吳錄

陳留董昶字仲道尉城晉書隱逸傳作董養琅邪王澄字平子

陳留阮瞻字千里一云阮八百即瞻弟字字遙集

瞻有減故穎川庾敳字子嵩陳留謝鯤字幼輿

太山胡母輔之字彥國沙門于法龍樂安光

逸字孟祖

右晉中朝八達近世間之故老何注晉光逸

胡母輔之初至屬輔之與謝鯤阮放畢卓羊曼桓彝阮孚散髮裸袒閉室酣飲已數日逸將排戶入守者不聽逸便于戶外脫衣露頭于狗竇中窺之而大叫輔之驚曰他人決不能爾必我孟祖也呼入與飲不舍晝夜時人謂八達据此則八達無董昶王澄庾敳僧法龍及阮瞻而瞻弟

裴徽字文秀魏冀州刺史樹按裴松之魏志裴潛傳注潛少弟徽字文季此作秀疑誤

裴楷字叔則徽第三子晉裴綽字季舒楷弟長裴

瓚字國寶楷子中裴邈字景初楷孫欽子太傅左

志作裴遐字叔道瓚子太傅主簿謝按裴松之三

子此作瓚裴康字仲豫微第二子裴頠字逸民楷

季子晉尚書僕射謝按裴注頠乃潞孫秀子楷其

王祥字休徵晉太王戎字濬仲父渾涼州刺史王

澄字平子衍弟裴綽女王導字茂宏覽孫裁子敦

王綏字萬子戎子早亡王衍字夷甫父又平北將

尉王敦字處仲覽孫基第二王元字眉子衍子陳

右河東八裴琅邪八王聞之於故老何法世

說裴王

二族盛于魏晉之世，入裴方入王，裴徽方王，
祥，裴楷方王衍，裴康方王綏，裴綽方王澄，裴
瓚方王敦，裴遐方王導，裴頠方王戎，裴邕方
王元，裴康兄，黎弟，楷綽並有盛名，又謂四裴。

魏司空王昶，字文舒。昶子汝南太守湛，字慶冲。

何注：太守當作內史。謝按：裴松之魏志：王昶傳注亦作太守。湛子東海內史承。

李安期。何注：內史當作太守。謝按：沈約宋書：州郡

志有太守有內史。東海稱太守，不稱內史。

晉書：百官志：諸王國以內史掌太守之任。宋志亦

云：漢初，王國置太傅、掌輔導，內史主治民。丞相統

衆官，成帝更令相治民，如郡太守。省內史，東漢亦

置相一人，主治民。晉武帝改太守爲內史，省相。是

治王國者，稱內史。他郡稱太守，其職一也。時東承

海王越國東海，故承稱東海內史，不稱太守也。

子驃騎將軍述，字懷祖。何注：述歷尚書令。此述子

驃騎將軍贈官也。

安北將軍坦之，字文度。何注：坦之官中書令。此安北將軍亦贈官。

魏尚書僕射杜畿字伯侯。畿子幽州刺史恕字

務伯。恕子鎮南將軍預字元凱。預子散騎常

侍錫字世嘏。何注晉書預傳錫終尚書左丞從前未嘗官常侍錫子光祿

大夫父字宏治。何注晉書外戚傳父字宏理襲爵辟公府掾為丹陽丞早卒金紫光

祿大夫其追贈官也

右太原王京兆杜各稱五世盛德聞之於故

老凡書籍所載及故老所傳善惡聞於世者

蓋盡於此矣。漢稱田叔孟舒等十人及田橫

兩客魯二儒史並失其名夫操行之難而姓

名翳然所以撫卷長歎不能已已者也。

八儒

夫子沒後散於天下。設於中國。成百氏之源。爲綱紀之儒。居環堵之室。葺門圭竇。甕牖繩樞。併日而食。以道自居者。有道之儒。子思氏之所行也。衣冠中。動作順。大讓如慢。小讓如僞者。子張氏之所行也。顏氏傳詩爲道。爲諷諫之儒。孟氏傳書爲道。爲疎通致遠之儒。漆雕氏傳禮爲道。爲恭儉莊敬之儒。仲梁氏傳樂爲道。以和陰陽。爲移風易俗之儒。樂正氏傳春秋爲道。爲屬辭比事之儒。公孫氏傳易爲道。爲潔淨精微之儒。

三墨

不累於俗。不飾於物。不尊於名。不忤於衆。此宋劔
尹文之墨。裘褐爲衣。跂蹻爲服。日夜不休。以自苦
爲極者。相里勤五侯子之墨。俱稱經而背譎不同。
相謂別墨以黑白。此苦獲以齒。鄧陵子之墨。宋庠私記
日入儒三墨二條。似後人妄加。非陶公本意。四入
目之末陶自爲說。曰。書籍所載。及故老所傳。善惡
聞於世者。蓋盡於此。卽知其後無餘事矣。

諸本評陶彙集

自李公煥本靖節集前有總論諸本踵之遞有增錄今彙爲一卷刪其重複又續采數條附於其後其已見本篇者則悉畧焉

朱文公語錄曰晉宋人物雖曰尙清高然箇箇要官職這邊一面清談那邊一面招權納貨陶淵明眞个能不要此所以高於晉宋人物

又曰作詩須從陶柳門中來乃佳不如是無以發蕭散冲澹之趣不免於局促塵埃無由到古人佳處

言不言明
又曰陶淵明詩平淡出於自然後人學他平淡便相去遠矣某後生見人做得詩好銳意要學遂將淵明詩平仄用字一一依他做到一月後便解自做不要他本子方得作詩之法

又曰韋蘇州詩直是自在其氣象近道陶却是有
力但詩健而意閒隱者多是帶性負氣之人爲之
陶欲有爲而不能者也又好名韋則自在

楊龜山語錄曰淵明詩所不可及者冲澹深粹出
於自然若曾用力學然後知淵明詩非著力所能
成也

眞西山曰淵明之作宜自爲一編以附於三百篇
楚辭之後爲詩之根本準則

魏鶴山曰世之辨證陶氏者曰前後名字之互變
也死生歲月之不同也彭澤退休之年史與集所
載之各異也然是所當考而非其要也其稱美陶
公者曰榮利不足以易其守也聲味不足以累其
眞也文辭不足以溺其志也然是亦近之而其所
以悠然自得之趣則未之深識也風雅以降詩人
之辭樂而不淫哀而不傷以物觀物而不牽於物
吟詠性情而不累於情孰有能如公者乎有謝康

樂之忠而勇退過之。有阮嗣宗之達而不至於放。有元次山之漫而不著其迹。此豈小小進退所能窺其際耶。先儒所謂經道之餘。因閒觀時。因靜照物。因時起志。因物寓言。因志發詠。因言成詩。因詠成聲。因詩成音者。陶公有焉。

胡仔茗溪漁隱叢話曰。東坡在潁州時。因歐陽叔弼讀元載傳。歎淵明之絕識。遂作詩云。淵明求縣令。本緣食不足。束帶向督郵。小屈未爲辱。翻然賦歸去。豈不念窮獨。重以五斗米。折腰營口腹。云何元相國。萬鍾不滿欲。胡椒銖兩多。安用八百斛。以

此殺其身何翅抵鵲玉往者不可悔吾其反自燭
淵明隱約栗里柴桑之間或飯不足也顏延年送
錢二十萬卽日送酒家與蓄積不知紀極至藏胡
椒八百斛者相去遠近豈直睢陽蘇合彈與蜣螂
糞丸比哉

東坡曰孔子不取微生高孟子不取於陵仲子惡
其不情也淵明欲仕則仕不求之爲嫌欲隱則
隱不以去之爲高飢則扣門而乞食飽則雞黍以
延客古今賢之貴其真也

父曰淵明作詩不多然其詩質而實綺癯而實腴

曹劉鮑謝李杜諸人皆莫及也

黃山谷跋淵明詩卷曰血氣方剛時讀此詩如嚼枯木及縣厯世事知決定無所用智又云謝康樂庾義城之詩鑪錘之功不遺餘力然未能窺彭澤數仞之牆者二子有意於俗人贊毀其工拙淵明直寄焉持是以論淵明亦可以知其關鍵也

又曰寧律不諧而不使句弱用字不工不使語俗此庾開府之所長也然有意於爲詩也至於淵明則所謂不煩繩削而自合者雖然巧於斧斤者多疑其拙窘於檢括者輒病其放孔子曰甯武子其

智可及也。其愚不可及也。淵明之拙與放，豈可爲不知者道哉？道人曰：如我按指，海印發光，汝暫舉心，塵勞先起。說者曰：若以法眼觀，無俗不真；若以世眼觀，無真不俗。淵明之詩，當與一邱一壑者共之耳。

又曰：退之於詩，本無解處，以才高而好耳。淵明不爲詩，寫其胸中之妙耳。無韓之才，與陶之妙，而學其詩，終樂天耳。

又曰：鍾嶸評淵明詩爲古今隱逸詩人之宗。余謂陋哉斯言，豈足以盡之？不若蕭統云：淵明文章不

羣詞彩精拔。跌宕昭彰。獨超衆類。抑揚爽朗。莫之與京。橫素波而傍流。干青雲而直上。語時事則指而可想。論懷抱則曠而且真。加以貞志不休。安道苦節。不以躬耕爲恥。不以無財爲病。自非大賢篤志。與道汗隆。孰能如是乎。此言盡之矣。

葛常之韻語陽秋曰。陶潛謝朓詩皆平澹。有思致。非後來詩人鉅心劇目雕琢者所爲也。老杜云。陶謝不枝梧。風騷共推激。紫燕自超詣。翠駁誰剪剔。是也。大抵欲造平淡。當自組麗中來。落其紛華。然後可造平淡之境。如此則陶謝不足進矣。今之人

多作拙易詩而自以爲平澹。識者未嘗不絕倒也。梅聖俞和晏相詩云。因令適性情。稍欲到平澹。苦詞未圓熟。刺口劇菱芡。言到平澹處甚難也。李白云。清水出芙蓉。天然去雕飾。平澹而到天然處。則善矣。

陳后山曰。鮑照之詩華而不弱。陶淵明之詩切於事情。但不文耳。

蔡寬夫西清詩話曰。淵明意趣真古清淡之宗。詩家視淵明猶孔門視伯夷也。

休齋曰。人之爲詩要有野意。語曰。質勝文則野。蓋

詩非文不腴，非質不枯。能始腴而終枯，無中邊之殊。意味自長。風人以來，得野意者，淵明而已。

雪浪齋日記曰：爲詩欲詞格清美，當看鮑昭、謝靈運，欲渾成而有正始以來風氣，當看淵明。

劉後村曰：士之生世，鮮不以榮辱得喪撓敗其天真者。淵明一生惟在彭澤八十餘日涉世故，餘皆高枕北窗之日，無榮惡乎辱，無得惡乎喪。此其所以爲絕唱而寡和也。二蘇公則不然，方其得意也，爲執政侍從，及其失意也，至下獄過嶺，晚更憂患，於是始有和陶之作。二公雖惓惓於淵明，未知淵

明果印可否。

又曰。柳子厚之貶。其憂悲憔悴之歎。發於詩者。特爲酸楚。卒以憤死。未爲達理。白樂天似能脫處。軒冕者。然榮辱得失之際。銖銖校量。而自矜其達。每詩未嘗不著此意。是豈真能忘之者哉。亦力勝之耳。惟淵明則不然。觀其貧士責子。與其他所作。當憂則憂。當喜則喜。忽然憂樂兩忘。則隨所寓而皆適。未嘗有擇於其間。所謂超世遺物者。要當如是而後可。觀三人之詩。以意逆志。人豈難見。以是論賢不肖之實。何可欺乎。

又曰。所貴於枯淡者。謂外枯而中膏。似淡而實美。淵明子厚之流是也。若中邊皆枯。亦何足道。佛言。譬如食蜜中邊皆甜。人食五味知其甘苦。皆是能分別其中邊者。百無一也。

湯文清公曰。按詩中言本志少。說固窮多。夫惟忍於飢寒之苦。而後能存節義之閑。西山之所以有餓夫也。世士貪榮祿事豪侈。而高談名義。自方於古之人。余未之信也。

以上李公煥原採總論。

朱子曰。張子房五世相韓。韓亡。不愛萬金之產。弟

死不葬。爲韓報讐。雖博浪之謀不遂。衡陽之命不延。然卒藉漢滅秦。誅項。以攄其憤。然後棄人間事。導引辟穀。託意寓言。將與古之形解銷化者相期於八紘九垓之外。使千載之下。聞其風者。想像歎息。不知其心胷面目爲何如人。其志可謂壯哉。陶元亮自以晉世宰輔。子孫恥復屈身後代。自劉裕篡奪勢成。遂不肯仕。雖功名事業不少槩見。而其高情逸想。播於聲詩者。後世能言之士。皆自以爲莫能及也。蓋古之君子。其於天命民彝。君臣父子。大倫大法所在。惓惓如此。是以大者旣立。而後節。

槩之高。語言之妙。乃有可得而言者。如其不然。則紀遠唐林之節。非不苦。王維儲光羲之詩。非不翛然清遠也。然一失身於新莽祿山之朝。則其平生之所辛勤而僅得以傳世者。適足爲後人嗤笑之資耳。

眞西山曰。予聞近世之評詩者。淵明之辭甚高。而其旨則出於莊老。康節之辭若卑。而其旨則原於六經。以余觀之。淵明之學。正自經術中來。故形之於詩。有不可掩。如榮木之憂。逝水之歎也。貧士之詠。簞瓢之樂也。飲酒末章有曰。羲農去我久。舉世

少復眞汲汲魯中叟。彌縫使其淳。淵明之智及此。豈虛玄之士可望耶。雖其遺榮辱。一得喪。眞有曠達之風。細玩其辭。時亦悲涼感慨。非無意世事者。或者徒知義熙以後不著年號爲恥事二姓之驗。而不知其惓惓王室。蓋有乃祖長沙公之心。獨以力不得爲。故肥遯以自絕。食薇飲水之言。銜木填海之喻。至深痛切。顧讀者弗之察耳。淵明之志若此。是又豈毀彝倫而外名教者所可同日語乎。

何孟春曰。以靖節爲老莊語出朱子。而眞氏爲之辨如此。蓋朱語門人所錄未可信。靖節人品未可

言言附錄
輕議吳臨川跋朱子書陶詩亦云朱子嘗言陶靖節見趣多是老子意此直晦庵一時所見如此耳非遂有所貶也

陳善捫蝨新語曰文章以氣韻爲主氣韻不足雖有辭藻要非佳作也昨讀淵明詩頗似枯淡久而有味東坡晚年極好之謂李杜不及也此無他韻而已

嚴滄浪詩話曰漢魏古詩氣象混沌難以句摘晉以還方有佳句如淵明採菊東籬下悠然見南山謝靈運池塘生春草之類謝所以不及陶者康樂

之詩精工。淵明之詩質而自然耳。

許彥周詩話曰。陶彭澤詩。顏謝潘陸皆不及者。以其平昔所行之事。賦之於詩。無一點媿辭。所以能爾。

黃徹碧溪詩話曰。淵明非愛枯槁。其所以感歎時化。推遷者。蓋傷時人之急於聲利也。非畏亂離。其所以愁憤於干戈盜賊者。蓋以王室元元爲懷也。俗士何足以識之。

敖陶孫詩評曰。陶彭澤詩。如絳雲在霄。舒卷自如。鄭厚藝圃折衷曰。陶淵明詩。如逸鶴任風。閒鷗忘

海。

劉後村詩話曰。陶公如天地間之有醴泉慶雲。是惟無出。出則爲祥瑞。且饒坡公一人和陶可也。

松石軒詩評曰。陶潛之作。如清瀾白鳥。長林麋鹿。雖弗嬰籠絡。可與其潔。而隱顯未齊。厭欣猶滯。直適乎此。而不能忘隘乎彼者耶。

何孟春曰。陶公自三代而下爲第一流人物。其詩文自兩漢以還爲第一等作家。惟其習次高。故其言語妙。而後世慕彼風流。未嘗不欽厥制作。欽厥制作。未嘗不尙論其人之爲。伯夷爲黔婁。爲靈均。

子房孔明也。

以上何孟春陶集附錄及總論所增。

鍾嶸詩品曰。宋徵士陶潛詩。其源出於應璩。又協左思風力。文體省靜。殆無長語。篤意真古。辭興婉愜。每觀其文。想其人德。世歎其質直。至如歡言酌春酒。日暮天無雲。風華清靡。豈直爲田家語耶。古今隱逸詩人之宗也。

蘇東坡曰。觀陶彭澤詩。初若散緩不收。反覆不已。乃識其奇趣。每體中不佳。輒取讀。不過一篇。惟恐讀盡後。無以自遣耳。

李獻吉曰靖節高才豪逸人也而復善知幾厥遭
靡時潛龍勿用然予讀其詩有俯仰悲慨玩世肆
志之心焉

李賓之曰陶詩質厚近古愈讀而愈見其妙

王元美藝苑卮言曰淵明託旨冲澹其造語有極
工者乃大入思來琢之使無痕迹耳後人苦一切
深沈取其形似謂爲自然謬以千里

茅鹿門曰間讀陶先生所著歸去來辭併五柳先
生傳千年來共謂古之栖逸者流而以詩酒自放
者也己而予三復之及讀詠三良詠荆軻與感士

不遇賦。其中多嗚咽感慨之旨。予獨疑其晉室之傾。竊欲按張子房故事。以五世相韓故。而行擊博浪沙中者。然子房創謀雖無成。猶藉真人起豐沛。附風雲。稍及依漢以亡秦也。嗟乎。先生獨不偶。故其言曰。一朝長逝後。願言同此歸。又曰。惜哉劍術疎。奇功遂不成。其人雖云沒。千載有餘情。又曰。伊古人之慷慨。病奇名之不立。屈雄志於戚豎。竟尺土之無及。然則先生豈盼盼然歌詠泉石沈冥。麋藥者而已哉。吾悲其心懸萬里之外。九霄之上。獨憤翮之縶。而蹄之蹶。故不得已以詩酒自溺。躑躅

徘徊待盡邱壑焉耳。

劉朝箴曰。靖節非儒非俗。非狂非狷。非風流。非抗執。平淡自得。無事脩飾。皆有天然自得之趣。而飢寒困窮。不以累心。但足其酒。百慮皆空矣。及感遇而爲文詞。則率意任真。畧無斧鑿痕。煙火氣。千載之下。誦其文。想其人。便愛慕向往。不能已已。

潛玉曰。靖節先生孤士也。篇中曰孤松。曰孤雲。皆自況語。人但知義熙以後先生恥事二姓。孤隱於醉石五柳間。而不知義熙以前。雖與鎮軍督郵同塵錯處。而先生之孤自若。故其詩云。自我抱茲獨。

俯仰四十年。又云此士胡獨然。實由罕所同。慨不生炎帝帝魁之世。而賦感士不遇。云擁孤襟以卒歲。謝良價於朝市。蓋合晉宋而發慨也。豈其參軍事。令彭澤卽云良價哉。顏延年曰。物尙孤生。先生眞孤生也。

以上毛晉綠君亭本陶集總評所增。

葉少蘊夢得石林詩話曰。詩品論淵明以爲出於應璩。此語不知其所據。應璩詩不多見。惟文選載其百一詩一篇。所謂下流不可處。君子慎厥初者。與陶詩了不相類。五臣注引文章錄云。曹爽用事。

多違法度。璩作此詩以刺在位。意若百分有補於一者。淵明正以脫畧世故。超然物外爲意。顧區區在位者何足槩其心哉。且此老何曾有意欲以詩自名。而追取一人而模倣之。此乃當時文士與世進取競進而爭長者所爲。何期此老之淺。蓋嶸之陋也。

蘭莊詩話曰。鍾嶸品陶潛詩。文體省靜。殆無長語。篤意真古。辭興婉愜。古今隱逸詩人之宗也。可謂知言矣。而寘之中品。其上品十一人。如王粲阮籍輩。顧右於潛耶。論者稱嶸洞悉元理。曲臻雅致。標

揚極界以示法程自唐而上莫及也吾獨惑於處
潛焉。

林君復逋曰陶淵明無功德及人而名節與功臣
義士等何耶蓋顏子以退爲進甯武子愚不可及
之徒歟。

東坡詩話曰古之詩人有擬古之作矣未有追和
古人者也追和古人則始於東坡吾於詩人無所
甚好獨好淵明之詩淵明作詩不多然其詩質而
實綺癯而實腴自曹劉鮑謝李杜諸人皆莫及也
吾前後和其詩凡百有九篇至其得意自謂不甚

愧淵明。然吾之於淵明，豈獨好其詩也哉？如其爲人，實有感焉。淵明臨終疏告儼等，吾少而窮苦，每以家弊東西遊走，性剛才拙，與物多忤，自量爲己必貽俗患，僂俛辭世，使汝等幼而飢寒。淵明此語，蓋實錄也。吾真有其病，而不蚤自知，半世出仕，以犯大患，此所以深愧淵明。欲晚節師範其萬一也。范元寶潛溪詩眼曰：東坡和貧士詩，夷齊恥周粟，高歌誦虞軒，祿產彼何人，能致綺與園，古來辟世士，死灰或餘烟，末路益可羞，朱墨手自研。淵明初亦仕，絃歌本誠言，不樂乃徑歸，視世嗟獨賢。此言

夷齊自信其去。雖武王不能挽之。使留。四皓自信其進。雖產祿之聘。亦爲之出。蓋古人無心於功名。信道而進退。故其名之傳。如死灰之餘煙也。後之君子。旣不能以道進退。又不能忘世俗之毀譽。多作文以自名其出處。故曰朱墨手自研。若淵明初亦仕絃歌。本誠言。蓋無心於名。雖晉末亦仕。合於綺園之出。其去也。亦不待以微罪行。不樂乃徑歸。合於夷齊之去。其進退。蓋相似。使其易地。未必不追蹤二子也。東坡作文。工於命意。必超然獨立於衆人之上。非如昔人稱淵明以退爲高耳。

朱子文集曰淵明詩所以爲高正在不待安排。胷中自然流出。東坡乃篇篇句句依韻而和之。雖其高才似不費力。然已失其自然之趣矣。

都元敬穆南濠詩話曰。陳後山謂陶淵明之詩。切於事情。但不文耳。此言非也。如歸園田居云。曖曖遠人村。依依墟里煙。狗吠深巷中。雞鳴桑樹顛。東坡謂如大匠運斤。無斧鑿痕。如飲酒其一云。衰榮無定在。彼此更共之。山谷謂類西漢文字。其五云。結廬在人境。而無車馬喧。問君何能爾。心遠地自偏。王荊公謂詩人以來無此四句。又如桃花源記云。

不知有漢，無論魏晉。唐子西謂造語簡妙，復曰：晉人工造語，而淵明其尤也。後山非無識者，其論陶詩特見之偶偏，故異於蘇黃諸公耳。

姜白石詩說曰：淵明天資既高，趣詣又遠，故其詩散而莊，澹而腴，斷不容作邯鄲步也。

蔡寬夫詩話曰：淵明詩，唐人絕無知其奧者，唯韋蘇州白樂天嘗有效其體之作，而樂天去之亦自遠甚。太和後風格頓衰，不特不知淵明而已。然薛能鄭谷乃皆自言師淵明。能詩云：李白終無敵，陶公固不刊。谷詩云：愛日滿階看古集，只應陶集是

吾師。

釋惠洪冷齋夜話曰東坡嘗云淵明詩初視若散
緩熟視有奇趣如日日暮巾柴車路暗光已夕歸
人望煙火稚子候簷隙又曰採菊東籬下悠然見
南山又曰靄靄遠人村依依墟里煙犬吠深巷中
雞鳴桑樹顛大率才高意遠則所寓得其妙遂能
如此如大匠運斤無斧鑿痕不知者疲精力至死
不悟如曰一千里色中秋月十萬軍聲半夜潮又
曰蝴蝶夢中家萬里子規枝上月三更又曰深秋
簾幕千家雨落日樓臺一笛風皆寒乞相一覽便

盡初如秀整熟視無神氣以其字露也東坡作對則不然如曰山中老宿依然在案上楞嚴已不看之類更無齟齬之態細味之對偶親的而字不露也此真得淵明之遺意耳

都元敬南濠詩話曰東坡拈出淵明談理之語有三采菊東籬下悠然見南山笑傲東軒下聊復得此生客養千金軀臨化消其寶皆以爲知道之言予謂淵明不止於知道而其妙語亦不止是如云縱浪大化中不喜亦不懼應盡便須盡無復獨多慮望雲慚高鳥臨水愧游魚真想初在襟誰謂形

言不言附錄卷
二
迹拘。朝與仁義生。夕死復何求。及時當勉勵。歲月
不待人。前途當幾許。未知止泊處。古人惜寸陰。念
此使人懼。蓋真有得於道者。非尋常人能蹈其軌
轍也。

陳善捫蝨新語曰。山谷嘗云。白樂天柳子厚俱效
淵明作詩。而惟子厚詩爲近。然以予觀之。子厚語
近而氣不近。樂天學近而語不近。子厚氣悽愴。樂
天語散緩。各得其一。要於淵明詩未能盡似也。東
坡亦嘗和陶詩百餘篇。自謂不甚愧淵明。然坡詩
語亦微傷巧。不若陶語體合自然。要知陶淵明須

觀江文通雜體詩中擬淵明作者方是逼真。
又曰余每論詩以陶淵明韓杜諸公皆爲韻勝。一
日見林倅於徑山夜話及此林倅曰詩有格有韻。
故自不同如淵明詩是其格高謝靈運池塘春草
之句乃其韻勝也。格高似梅花韻勝似海棠花。予
聽之瞿然若有悟。

楊廷秀萬里讀淵明詩有句云故文了無改乃似
未見寶貌同覺神異舊玩出新妙。

陳伯敷繹會文章歐冶曰淵明心存忠義身處閑
逸情真景真意真事真幾於十九首矣至其工夫

精密而天然無斧鑿痕。又有出於十九首之表者。盛唐諸家風韻皆出此。

宋景濂曰。陶元亮天分之高。其先雖出於太冲。景陽究其所自得。直超建安而上之。高情遠韻。殆有太羹充飴。不假鹽醯而至。味自存者也。

王彝跋臨流賦詩圖曰。陶淵明臨流則賦詩。見山則忘言。殆不可謂見山不賦詩。臨流不忘言。又不
可謂見山必忘言。臨流必賦詩。蓋其胸中似與天
地同流。其見山臨流皆其偶然。賦詩忘言亦其適
然。故當時人見其然。淵明亦自言其然。然而爲淵

明者亦不知其所以然而然也。又何以知其然哉。蓋得諸其胷中而已。

李賓之懷麓堂詩話曰。陶詩質厚近古。愈讀而愈見其妙。韋應物稍失之平易。柳子厚則過於精刻。世稱陶韋。又稱韋柳。特槩言之。惟謂學陶者須自韋柳而入。乃爲正耳。

趙鈍叟維寰曰。淵明大節自足不朽。要以興會所到。悠然得句。意不在詩。亦如琴不必絃。書不甚解。云爾。必以爲字字句句皆關君父。又烏知陶詩不墜經生刻畫苦海乎。

楊用修升菴詩話曰。晉書云。陶淵明讀書不求甚解。此語俗士之見。後世不曉也。余思其故。自兩漢來。訓詁盛行。說五經之文。至於二三萬言。陶心知厭之。故超然真見。獨契古初。而晚廢訓詁。俗士不達。便謂其不求甚解矣。又是時周續之與學士祖企。謝景夷從刺史檀韶聘講禮城北。加以讐校。所住公廨。近於馬肆。淵明示以詩云。周生述孔業。祖謝響然臻。馬隊非講肆。校書亦以勤。蓋不屑之也。觀其詩云。先師遺訓。今豈云墜。又曰。詩書敦宿好。又云。游好在六經。又云。汎覽周王傳。流觀山海圖。

其著聖賢羣輔錄五孝傳贊考索無遺。又跋之云。書傳所載故老所傳盡於此矣。豈世之鹵莽不到心者耶。予嘗言人不可不學。但不可爲講師溺訓詁。見淵明傳語深有契耳。

陸樹聲長水曰抄曰陶淵明飲酒田園諸作見者若疑其爲閑淡絕物散誕自居也。而不知其雅操堅持苦心獨復處觀其詩曰。悽悽失羣鳥。日暮猶獨飛。徘徊無定止。夜夜聲轉悲。厲響思清遠。去來何依依。又云勁風無榮木。此蔭獨不衰。託身已得所。千載不相違。其特立惕厲若此。至其會意忘言。

處心境廓然此正獨復從道處亦所謂憂世樂天
並行不悖

江進之盈科雪濤詩評曰陶淵明超然塵外獨闢
一家蓋人非六朝之人故詩亦非六朝之詩

張爾公潔生曰淵明無之非寄凡穫稻飲酒乞食
讀書皆寄耳詩又寄之寄也豈必銖銖兩兩與餘
人較工拙論喜憎哉

顧炎武曰知錄曰末世人情彌巧文而不慙固有
朝賦采薇之篇而夕有捧檄之喜者苟以其言取
之則車載魯連斗量王蠋矣曰是不然世有知言

者出焉。則其人之真僞。卽其言辨之。而卒莫能逃也。黍離之大夫。始而搖搖。中而如噓。旣而如醉。無可奈何。而付之蒼天者。真也。汨羅之宗臣。言之重辭之複。心煩意亂。而其辭不能以次者。真也。栗里之徵士。淡然若忘於世。而感憤之懷。有時不能自止。而微見其情者。真也。其汲汲於自表暴而爲之言者。僞也。

黃維章文煥陶詩析義序曰。古今尊陶。統歸平淡。以平淡槩陶。陶不得見也。析之以鍊字鍊章。字字奇奧。分合隱現。險峭多端。斯陶之手眼出矣。鍾嶸

品陶徒曰隱逸之宗。以隱逸蔽陶。陶又不得見也。析之以憂時念亂。思扶晉衰。思抗晉禪。經濟熱腸。語藏本末。湧若海立。屹若劍飛。斯陶之心。膽出矣。若夫理學標宗。聖賢自任。重華孔子。耿耿不忘。六籍無親。悠悠生歎。漢魏諸詩。誰及此解。斯則靖節之品位。竟當俎豆於孔廡之間。彌朽而彌高者也。開此三例。懸之萬年。佳詠本原。方免埋沒。否則摩詰羣孟羣附陶派。誰察其霄壤者。

以上吳瞻泰陶詩彙注所增。

鍾伯敬曰。陶詩閒遠。自其本色。一段淵永淹潤之

氣其妙全在不枯。

趙鈍叟曰。淵明靈運同爲晉室勲臣之裔。靈運浮沈禪代。襲爵康樂。晚乃自悔。有韓亡秦帝之語。博浪未椎。身名並隕。以陸家聲惜哉。獨淵明解組肆志鴻冥。鼎革之間。不友不臣。易紀元以甲子。凜然春秋大義。雖寄懷沈湎。而德輝彌上。殆首陽之展禽箕山之接輿也。

以上蔣熏陶詩總論所增。

施彥執北牕炙輟錄曰。人見淵明自放於田園詩酒中。謂是一疎懶人耳。不知其平生學道至苦。故

其詩曰淒淒失羣鳥日暮猶獨飛徘徊無定止夜
夜聲轉悲厲響思清越去來何依依因植孤生松
歛翮遙來歸勁風無榮木此蔭獨不衰繫身已得
所千載莫相違其苦心可知既有會意處便一時
放下

又曰周正夫云人言陶淵明隱淵明何嘗隱正是
出耳

又曰正夫書論杜子美陶淵明詩云子美讀盡天
下書識盡萬物理天地造化古今事物盤礴鬱積
於胷中皓乎無不載遇事一觸輒發之於詩淵明

隨其所見指點成詩見花卽道花遇竹卽說竹更無一豪作爲故予嘗有詩云子美學古曾萬卷鬱含蓄遇事時一麾百怪森動目淵明澹無事空洞撫便腹物色入眼來指點詩句足彼豈發其藏此但隨所觸二老詩中雄同人不同曲蓋本於正夫之論也

淵明詩云山氣日夕佳飛鳥相與還此中有眞意欲辨已忘言時達磨未西來淵明早會禪此正夫云全上

王圻稗史曰詩本觸物寓興吟咏情性但能翰寫

胷中所欲言無有不佳而世多役於組織雕鏤故
語言雖工而淡然無味與人意了不相關嘗觀淵
明告子儼等疏云少學琴書偶愛閑靜開卷有得
便欣然忘食見樹木交蔭時鳥變聲亦復欣然有
喜嘗言五六月中北窗高卧遇涼風暫至自謂是
羲皇上人此皆其平生真意及讀其詩所謂孟夏
草木長繞屋樹扶疎衆鳥欣有托吾亦愛吾廬既
耕亦已種時還讀我書又微雨從東來好風與之
俱直是傾倒所有借書於手初不自知爲語言文
字此其所以不可及人誰無三間屋夏月飽眠睡

凭几讀書，藉木陰聽鳥聲，而唯淵明獨知爲至樂。則知世間好事人所共有，而不能自受用者，何可勝數。吾今歲闢東軒，自伐林間大竹爲小榻，一夫負之可趨，擇美木佳處，卽曲肱跋足而卧，殆未覺有暑氣，不知與淵明所享孰多少，但恨無此詩耳。

此條見葉夢得石林詩話，凡王氏所采皆前人舊說，不一一細標出處也。

又曰：情之所蓄，無不可吐出；景之所觸，無不可寫入。晉惟淵明，唐惟少陵，敘事者如畫師肖貌，各隨其形之妍媸；議論者如老吏斷獄，悉得其情之本末。漢惟子長，宋惟子瞻。

又曰陶淵明詩如白日掩柴扉虛室絕塵想固可見其有道氣象而萬物各有托孤雲獨無依可以見其孤忠自許詠荆軻一篇蓋藉之以發孤憤耳故朱子謂此篇始露本象其自作輓詩劉坦之以曳杖易簣比之豈溢美哉李太白對影成三人之句亦出淵明欲言無子和揮盃勸孤景蓋其志有非他人窺測者世道衰降不能少見於行事讀其詩可以得其心焉

又曰陶詩淡不是無繩削但繩削到自然處故見其淡之妙不見其削之迹李詩逸不是無雕飾但其

雕飾到自然處，故見其逸之趣，不見其飾之痕。

又曰：杜有全學陶者。陶云：親戚或餘悲，他人亦已歌。又云：衆鳥欣有托，吾亦愛吾廬。而杜寫懷云：萬古一骸骨，鄰家遞歌哭。又云：羣生各一宿，飛動自儔匹。吾亦驅其兒，營營爲私實。明明自陶脫出來，但讀陶後二語，殊覺杜之爲煩。

又曰：李白亦多用陶語。陶云：揮盃勸孤影。而李云：獨酌勸孤影。陶云：但得琴中趣，何勞絃上聲。而李云：但得酒中趣，勿爲醒者傳。

馮鈍吟雜錄曰：陶公讀書，止觀大意，不求甚解。所

謂甚解者。如鄭康成之禮。毛公之詩也。世人讀書。正苦大意未通耳。乃云吾師淵明。不惟自誤。更以誤人。

以上新增。